

مستعمل

مستعمل

" لم يُكْتَبْ مِنْ قَبْل "

- أشعار بالعامية المصرية -

محمد عصام

تصميم الغلاف: أحمد سعيد بكير

رقم الإيداع: 2022/ 28585

I.S.B.N:978- 977-86500-1-3

الطبعة الأولى 2023م



للنشر والتوزيع

الإدارة: 17 ش عزت باشا المطرية، القاهرة.

المدير العام: آية سعد الدين

مدير النشر: د. رامي عبد الباقي

المدير التنفيذي: نائل عزت

هاتف: 01147633268 - 01099387500

E – mail: zeinpublish2017@gmail.com

Facebook: Zein Publish

جميع الحقوق محفوظة ©

محمد عصام

مستعمل

" لم يُكْتَبْ مِنْ قَبْل "

- أشعار بالعامية المصرية -



إهداء

للصدق..

أول لغة اتكلمها بطلاقة..

ورأس مالي اللي بصرف بيّه

على سطوري وقصايدي.

إهداء خاص

النهاردة الموت خَلَع.. م القلب حتّة
والجنة النهاردة..

- ياريت يارب - يزيدھا واحد!

مصعب صاحبنا عبد ربّه

عشان كدة ربّه ابتلاه

كان بيتوّجّع لوحده..

وكان موطّي آله بتاعته..

مش بيدوش ناس معاه

كان بيضحك وسطنا..

وكان المرض..

بينج بونج في معدته..

بيلاعه ب كرات الوجع!

كان يعافره بمضربه المسكين أوي..

وعُمر صبره ما يوم نَقص

كان المرض دايمًا بيكسب كل جولة..

وكنا بنشجّع ولينا أمل يفوز..

لكن خلاص ال Game خلص!

كنت بتقول إن انا شيمك أوي..

يفرقنا بس حاجات بسيطة..

زاد عليها ان انت مُت!!!

وانا تحت بدعيّلك ومش طايل يادوب بس المحك!

كان فيه في قلبك كراسي ياما..

للي طمعان تسمّعه..

وكرسى مكسورل اللي عاوز يجرحك!
عارف باني المرة دي قصّرت ياما..
لكن ورب الكعبة كنت..
رايح وحى في راسي محتار عامل ايه!
عمرك ما كنت خفيف.. خفيف.. على القلب اللي حبك
كنت ليك بصمة الزمن ما يمحهاش!
بذرة حُبّك..
اللي انت في يوم اديتهالي..
كنت انت اللي زارعها ب إيدك.. جوّة في قلبي
شوف طرحت إيه!..
أديك مش غايب عن بالي!
كنت باعت ليك بقولك "وحشتني"
بس انت مستعجل أوي..
كات راحتك اولى تحس بيها..
من آني يضايقي البعاد!
كإني جايلك ع المحطة كعادتي بجري..
وانت آخر قطر ليا..
طلّعت من قبل المعاد!
ما صدّق قش خبر موتك..
برغم ان الجميع قالوا "البقاء لله!"
ومكانش قصدي باني رايح اعزي فيك
انا كنت جايلك اودّعك
دلوقتي ماشي وقلبي متطمئن عليك
واتمنى دمع الناس عشانك..
تشوفه إنّه محبّة ليك.. مش يوجعك!

دلوقتي مش هيعلى الضغط والسكر عليك
ولا يعلى قلقي عليك عشان.. بعيد عنك مسافة
دلوقتي وجع العضم بيعيط عشان حاسس بذنب
وكل جلسات الكلى..

سجّدت وشكرت ربنا..

علشان خلاص مش جايلها
كل الحاجات اللي انت موجوع منها..
مبسوطة علشان.. مش هترجع تاني تتوسل لها!
دلوقتي أول مرة اكون خايف و انا بكتب لحد
وابكي وانا...

عيني ماهيش مكسوفة يلمس دمع خد
أمانة لو عجبك كلامي..

تجيلي في الحلم النهاردة..

هتلاقيني مستنيك ب"شاي مصعب" في إيدي
واجمع الشلة اللي بتحبك تشوفهم..
والسرتو..

في أوضتك العزلة القصيدة!

جي جري مش محتاج لـ "فيظا" يسندك!

تبقى المسافة مابيننا نومة..

مش هتحتاج أي قنطراو.. مسافات بعيدة

ولأمرضك ببعيدك!

وحتى لو ماطلعش عاجبك..

تجيني برضو..

طل بس وهبقى مبسوط من حضورك

عارفك هتضحك لما تقرا الحنة دي..

وتقولـي "صايـع"
وارد اقولـ..
كان نفسي تبقى انت اللي صايـع..
وتخدع الموت بس يوم واحد عشان..
كنّا احنا متفقين نزورك!
إبقى سلّم ليّا ع الناس اللي عندك كلهم
وصّل شبانة سلام كتير..
وشوقنا.. والحضن اللي كان نفسي اديهوله
ولو عليا..
مايكفينيش فيك في البكا.. اليوم بطوله
سيرتك على لسان الجميع بالخير يا صاحبي
وليك نصيب كل الدعا..
أويـعني ممكن معظّمه
لكيّ محتار برضو أزل..
ولا أفرح إنهم..
سيرتك بتيـجي مغيّرين إسمك ثلاثي..
لـ "مصعب الله يرحمه"!

الكتالوج

كل شئ في الأصل مستعمل
الكلام اللي انت بتقوله
والعياط اللي انت بتعوله
كام مكان خد جهد لوصوله
كان في ناس واصلين هناك قبلك
لفظ ماضي ولفظ مستقبل
والأمل واليأس والخيبة
كل وحدة مملة وكئيبة
كل سكر داب في تقليبة
انت زينه في دنيا.. مُستَهلك
كل شئ في الدنيا فاترينة
كل عرض له شكله وظروفه
كل شئ مبصوم عليه بنظرة
قبل ما عينيك تيجي وتشوفه
حضنك اللي دموع بنات بلاه
كفك اللي وداع كثير.. قسّاه
قلبك اللي مافيش أثر جواه
صاحبُه لسّة مكمل الفترة
كل أجرة وباقي في مواصلة
الجدال ع السعر في مُفاصلة
كل وقعة في حاجة ومواصلة

مكتسب بالوقت أو فطرة
المكاملة في غربة متكاملة
أم تبعث روحها في رسالة
مات في قلب سريره أكرمه
أو في حرب وخاضها ببسالة
خطوتك داسيت خطي قديمة
خطوة داسيت خطوتك في الحال
كل استقرار مالوش قيمة
والتضاد بين ممكنة ومُحال
كل شئ في الأصل متجرب
إوعى تحسب إن ده جديدك
كان في إيدك ثم إيد غيرك
كان في إيد غيرك.. وصل إيدك
والخيار دي أبسط الأمثال
حتى وانت بتقرا دلوقتي
خدت وقت زيادة من وقتك
ليك غرامة ضريبة استعمال!

100%

سَلَفَت رُوحِي

في جروح تبانلك سهلة وتعدّي
لكن في نظري.. صعب تتخيّط
صاحبي اللي قاللي : " ماتستاهلش عياط "
سَلَفْتُهُ رُوحِي .. لاقيتُهُ بيعيِّط!

...

أبرز صفات النصيب .. إِنَّهُ نافذ
ما فيهوش جدال ولا حد هيعارضه
مات الشهيد جني على الأسفلت
سَلَفْتُهُ رُوحِي .. مات شهيد برضه!

...

في إيديه وإيدي مُسدّسين متعمّرين
والشرساكين قلبه قوّاه ع العناد
يادوب هانزل إيدي .. وهاسلم عليه
سَلَفْنِي رُوحُهُ .. فجأة، دوست على الزناد!

...

صعب عليا عجوز في مترو زحام
قُمت وبادلته مكاني يُقعد فيه
فَقَالَ لي : " يا اه ، لويوم شبابي يعود "
سَلَفْتُهُ جِسْمِي .. ماصعبتش عليه!

...

في شارعنا أكثر من عامود قايد

والضلمة رَفَضَتْ وضعه.. بتصارع
عامود إنارة النور قَطَعَ عَنْهُ
سَلَفَتْهُ رُوحِي.. فَضَلَّمَ الشَّارِع!

...

حسيت بَمَلِك الموت هنا معايا
مكتوب معاد لزيارتُه.. لِسَّة ماجاش
شوفت إن أُمِّي عَيْنِيَا.. مَا بَطَلَّتْش عِيَاط
سَلَفَتْهَا رُوحِي.. عِلْشَان مَا تَوْحَشْهَاش

والمدهش صحيح.. ونستعجب عليه
لَمَّا التراب يسأل تراب: "كُنْتَ إِسْمَكَ إِيهِ؟"

ماصِدَقْتَش

ماصِدَقْتَش خَبَر مَوْتَك
برغم ان الجميع قالوا "البقاء لله"
لمحت الحزن في عيَنهم
وشافوا اني.. ناقصني حياة
وبنزف م الغياب في السر
فتطلع دعوة مجروحة
وكل الطبطة منهم..
على كتفي..
شوية الاقيها ممسوحة
والاقي دموعي زي النهر.. في ايديا
ومع ذلك..
بقوم الصبح اطل عليك
واحضر للغدا مناين
تسيب كل المناب ليا
يفوت صاحبك ينادي عليك
أقول لهُ: "ماجاش من المشوار"
ويومياً يعدي عليك..
في نفس الساعة تقريبا..
وارد عليه بنفس الرد
ماصِدَقْتَش كلام من حد
لو حدي الي ماصِدَقْتَش

يشوفني الناس كإني اتنين..
روحين فيا
كإني أخذت طلقّة في قلبي..
طلعت روح..
ولسّة التانيّة جوايا
وارد على السلام.. سلامين
وباحزن مرتين في اليوم
وباكل مرتين في اليوم
وانام مرة
واعيشلك دنيا ويايا
ومش بانسى..
عشان احتاج افكّر فيك
واقول اني الوحيد اللي ماصدّقتش
لحد ما كل يوم بيعجي..
يفوت صاحبك.. ينادي عليك!

أثر جانبي

شوية وازهق م الأغاني.. واروح ل غيرها
شوية وانقل م الأماكن.. اشوف بدالها
شوية وازهق م الجميع.. وارجع لوحدي
شوية والنشوة الجميلة.. تروح ل حالها
إحنا مش أول من استهلك.. لذلك
في شعور بالفوبيا من فكرة زوالها
كل حاجة بتيجي تاخذ وقتها..
وبمل منها
وهي حتماً بالضرورة.. تمل برضو
دي الآثار الجانبية ل حزن سابق
وانتصار اليأس لو واصل ل غرضه
دورة استهلاك جماعي.. بالتناوب
والجميع بيسيب فراغه لحد أولى
لكل شخص حاجات هيزهق وقت منها
والي بعده هيبقى له شرف المحاولة
فَ اللي هينام..
بدل الأدوار مع القايم يعافِر
والي قام م القهوة سايب..
كرسي فاضي للي بعده
الي نازل في المحطة..
بدل الأدوار مع الشخص المسافر

واللي بيكسروعوده..
بدّل الأدوار مع الصاين لوعده
وهبقى زي الكل برضو..
شويّة بزهدق م الأغاني.. واروح لغيرها
ملّوا منها.. اسمع بدالهم
شويّة بنقل م الاماكن.. اشوف بدالها
حد سايب فيها كرسي
شويّة بزهدق م الجميع.. وارجع لوحدي
واللي وحده يعود ل ناسه
شوية والنشوة الجميلة.. تروح لحالها
واللي زاهد كل شئ.. ياخذ مكاني
إحنا مش أول من استهلك.. لذا
باخذ كفايتي من الحاجات..
قبل أمّا أسيها لشخص ثاني!

كل اماً بَقَطْمُ تُفَاحَةٍ.. وَاسْتَأْمِنِهَا
بِاتْرَعِبِ إِنِّي أَنْزَلَ مِنَ الدُّنْيَا.. لِأَصْعَبِ مِنْهَا

ختم إثبات

في جُمَل ..

محتاجة م الغيب..

ختم يثبت إنَّها ممكن تكون..

نوع م الفضول

زي إن "بكرة هيبقى أجمل"

أو "هنبقى لبعض"

أو "إصبرتنول"

محتاج دليل ..

يشاورلي على بكرة اللي جاي..

بورد مثلاً..

حتى لو هيكون بلاستيك

جاي ب صُحبة كارت من إيد السحاب

مكتوب عليه "جايلك أكيد"

وممضي من "بُكرة الجميل"

الصبر صعب مش زي الكلام

حتى الكلام بقى عَنْهُ صعب

وسهله مبقاش ممتنع..

بقا مستحيل

راضي وببوس إيد الصُدْف والترتيبات

وحوادث الطرقات وإيد كل الحاجات

والحمد زي الريق على لساني العفيف..

مِش ببلعُه!
الحاضر اللي تاعبنا فيه..
- الليل خريف
بيوقّع الأحلام مع حلول النهار
ولو اعترض .. بيبقّعه!
- صعب الفراق ..
زي اللي دس سكاكين جوه صدرك .. مزّعه
وانت اللي زي النمل متداس ع البلاط
أو حتى مربوط جوّة أوضة..
كان شريكك فيها ديب!!
- والموت بيطرد ناس من الباب الرئيسي للحياة
قدام عينينا ..
واحنا ملناش في الهتاف ضد النصيب!!
والغيب بـ ايده يلطّف الحال عندنا
مش قصدي نعرف كل شئ
باقصّد يوضّح بالإشارة
إيه هيبقى الحلو بعد الصبر ده؟
أو بعد ما إتعودنا على طعم المرارة!
في جُمَل ..
محتاجة م الغيب..
ختم يثبت إنّها ممكن تكون..
بالتكلمة!
زي ان " بكرة هيبقى اجمل .. بعد فترة "
ويحدد معاد
أو " هنبقى لـ بعض .. ومؤكد هنبقى "

مش هندوق بَعاد
" اصبر تنول " ويعزّز الجُمْلَة بِمُكَافَأَة
تَخَفِّف المِرا لِي في كاسات العِبَاد!
وهل هدوق الفَرَح لو من باب مُجَامَلَة..أَسِنِدني بيه؟
ولا النِّهاية هلاقي قلبي
مِرمي في خرابَة حارتنا
والقِطَط و اقفين عليه!!

**ضربوا الرصاص قدامي ماتهزّتش
قالوا الكلام السيم .. قتلوني!**

فن البراويز

دايما في تأثير للكلام
بيدوم لفترة معينة.. وساعات يطول
في كلام جميل يسيب أثر..
وببقى براويز في القلوب
وكلام أذى.. زي الغُرْز
بيوقّع البراويز دي ثم.. يسيب ندوب!
مثلا في وقت ما كنت ناجح
شخص جه قالي انت "فاشل"
شَطَبْتِ الناجح بـ جاف!
كنت مرتاح مرة صدفة..
وحد قالي كلام كتير.. خلاني اخاف
كل تأثير حلوكات سايباه "بحبك"
جت "وداع" في فراق أخير..
خلت التأثير يقل.. أو ممكن يزول
وبكلمة من سابع سما..
للأرض تنزل
تتكسر نفسك ساعتها.. من الدهول!
إعترضت في مرة قولت باني "أقوى"
ثم سحبوا الحق مني.. بقيت "ضعيف"
فن اختيار اللفظ يطلع ليه وإمتي؟
وكل شخص لابد إنّه..

يحفظ الأثر اللطيف
فن برّوزة الكلام في القلب أجمل
من كلام تأثيره مش دايمًا قليل
واللسان زي المسدس له زناد
الكلمة منه بتقتل الأثر الجميل!

مالقيتش حل في حزني قولت " يارب "
مالقيتش حل في حزني قولت " يارب "
والدنيا إما بتمشي أو ثابتة
مالقيتش حل في حزني قولت " يارب "
والتالثة كات ثابتة!

مِشْ إِعْتِرَاضْ

يارب "ليه؟" مش إعتراض
ولا إمتعاض
أنا بس عايز أي رد..
أعدي بيه المرحلة
ماملكش غير.. ولا أي شئ
وقسمت روعي على أحلام كثيرة
ويا إنتهت.. يا مؤجلة
إيه يملك الشخص الحزين.. غير شكوتُه؟
إيه يملك الشخص الوحيد..
غير دعوة واحدة مفضلة؟..
"يارب جَمْع"
والعين .. غير إن الليل يعدي..
من غير أي دمع
ولو على ضعيف زي أنا..
ماملكش غيرك
وحَيّ باطلب رَحِمَتِكَ!
في حاجات كثير متلخبطة
غرقان في تيه.. فين السبيل؟
أبسّط مثال..
ماباقولش نفسي اوحشها
بس المسألة.. توحشني ليه؟
القصة وقفت عند توقيت الرحيل
الوضع أصبح فيه إختلال

وميزان حياتي مش على عدلته

تايه مابين ومابين ..

ومش باوصل لـ "بين" ..

ناس وصلته!

يارب مش " إشمعنا " لكن ..

نفسى برضو!

طاقتي صفروخايف امشي..جروح تزيد

والقى إن في نهاية الطريق.. كانت مراية

واني ببعد..

مش بقرب كل ده من أي ضي

قولت " هل موتي استوى؟ "

وصبرت لـ نوال الإجابة..

قالولي " نِي "!

سألت عن دود نفسه يأكل

قالوا مش بيجوع لـ حي

وماليش وسيط في الغيب

يسرّلي المعاد!

يارب لأ ..

مش إعتراض على حكمتك

أوع النصيب

أنا شكلي عكيت في الكلام

وبرغم ده ..

النّية تغفرلي اللي مش قاصد عليه

ولهذا عايز أسأل سؤال ..

الفترة دي هاتعدي بيا؟

ولو هتبقى إجابته لسة

فلسه ليه؟

في نفس الثانية

في نفس الثانية م العالم ..
أحداث كثير ممكن بتحصل ويا بعض
في روح بتخرج م الجسد
وفي وقتها ..
في روح بتكبر في الجسد
عيل بيشحخ لقمّة م المارين عليه
عيل بشوكة بيناول أبوه
اتنين بيتخانقوا في كافيه
واتفارقوا بعد خناق جهور
اتنين في أي مكان يجوز ..
بيصبرحوا بنفس الشعور
في الوقت نفسه ..
حادثة بتفاجئ صاحبها
كلبة ماشية في إيد صاحبها
دولة بتخرّب في دولة
حرب بتقوم بين أهالي
حرامي بيطفش جيوب
وحرامي بيطفش خزّن
بنت بتعيّط عشان حاسّة ب ألم
وعزا في شوارع والبشر بيعيطوا
والمهرجان ..
بمهرقاعة " اللؤلؤة "

أَعْمَى بِنَادِي الْإِلَهِ يَقْدَرِ سَعْفُهُ
مُبْصِرٌ بِيَتَفَرَّجَ عَلَى الْبَنَتِ الْإِلَهِ جِثْ
سَاجِدٌ بِيَدْعِي اللَّهَ يَفْرَجُ كَرِيَّتَهُ
بِيُوَلِّعُوا شَمُوعَ فِي الْكَنَائِسِ لِلصَّلَاةِ
وَاحِدٌ بِيَخْسِرُ صُحْبَتَهُ
مُسْعِفٌ بِيَلْتَمِ جِرْحَ مَفْتُوحٍ مِنْ مَفِيشِ
أَعْيَادِ مِيلَادٍ ..

وَكَمِينَ وَبُوكَسَ وَكَتَافَاتِ
مَسَاجِينَ فِي حَبْسٍ بِدُونِ أَمَلٍ
مِقَاطِيعَ فِي دَيْسَكُو مَدَامَ "أَمَلٍ"
وَاحِدٌ فِي غَرْبَةٍ بِيَسْأَلُ اللَّهَ ..
"إِيهِ الْعَمَلُ ؟"

مَلَائِينَ بِتَاخِذَ خَتَمَ بِاسْبُورِ السَّفَرِ
مَلَائِينَ بِتَاخِذَ أَكْسَجِينَ مَلِيَانِ عَقَرٍ
وَاحِدٌ بِيَدْعِي اللَّهَ يَتُوبُ خَالِصَ عَلَيْهِ ..
وَاحِدٌ كَفَرٍ

مَجْنُونٌ بِيَخْطَفُ بَوْسَةَ عَلَى سَلَمٍ كَافِيهِ
إِثْنَيْنِ لِأَوَّلِ مَرَّةٍ يَتَقَابِلُوا فِي صَالُونِ
فِي وَاحِدَةٍ تَرْفُضُ ..
لَهَا ١٠٠ وَجْهَةً نَظَرَ
وَوَاحِدَةٍ بِتَقُولُ "أَه" بِفَرْحَةٍ ..
تَهْزِقُ لِبِ الْإِنْتَرِيهِ
فِي الْوَقْتِ دَه ..

شَاعِرٌ غَرِيبٌ قَاعِدٌ بِيَفْرِضُ ..
عِنْدَ نَفْسِ الثَّانِيَةِ مُمْكِنٌ .. يَحْصَلُ إِيهِ!

من بعيد

آخري ار اقب من بعيد
وبسرعة تجمّع..
تفصيلات كل المشاهد بالفضول
باحديف عينيا تبص على ..

- طيارة ماشية بدون رجول
بهدهوها على أرض السما
أشُبكني فيها واطير معاها لفين تروح
ك هروب من الوضع المكلول
.....

- إثنين سوا ..
إيدهم بتتخانق في مين يمسخها أقوى
وجسمهم شبه ائتلف
اول ما صار الفرق بينهم..
صفر سنتي
قلب محروم إستلف..
من حُبهم ندعة أمان
مايحسّش إلا اللي بيدور عليه
كل المفارقين.. لو مفارقوش وقتها
الوضع كان غصب إختلف!
.....

- شنطة سفر..
فيها الستين والذكريات
وبواقي تفاصيل خضن ماكملش ل سبب
آخر جواب من شخص مايبشيهش حد..

أصبح يشبه للجميع
مزيكا هادية بتكنس الروح م العفر
والأكل وحاجات مش هتفرق
إلا في روتين السفر!

.....

- واحد لوحده في قهوة مستني ال " لا شئ "
وما يعرفوش
بقاله فوق الأسبوعين
يتفقوا على أنسب معاد
وما يتلاقوش!

.....

- قاعد بر اقب في الوشوش
فيهم كلام ماتقالش هيشق العينين
بأيدين ويخرج يتنطق..
يرسم خدوش!

.....

- حادث مريع ..
كان فيه احتمال يحصل لكنه..
صار أكيد
وانا كان في نفسي اني امنعه
أسف لكل المحتاجين مني المساعدة
بإني مكتوف الأيدي..
ومش سعيد
لكني رغم القرب كاميرا..
آخري اراقب من بعيد!

إِتَيْنِ تَوْفُؤًا..
واحد يبشرب..
خمرة في البار نفسه أكثر من سنة
والثاني قاضي..
بينصف الظالم برشوة تسكته
القاضي كل الناس ماجاتش تعزي فيه
أماً الخمور جي..
إتفاجئوا بالبار مان.. يبحضر دفتته!

الوش القديم

اللي زيي..
يجب يسكر بالنهار
مابقاش طبيعي أقابل العالم بملله..
بوش واحد كل يوم
وباخّي وشي الأصلي في جيوب الجاكت
كل الحاجات التايمة جوايا في زحام..
مع ثاني كاس إستمسكت
ف بقيت باقول الدمعة موشومة في خدودي
بدال ما أقول.. زعلت بكيت
بامشي في إيديا هز ايبي.. متصالحين سوا
رايحين معاد
ب رجل بتقدم دقيقة
ورجل بتأخر دقيقة
رجلي يا عقارب في ساعتني..
محتاجين حجرين جُداد
باسمّع ل تعالىم اليُفُط..
واستني إشارات المرور
وكإني سايق في الطريق
رابط حزام النشوّة منعاً للمخالفة
وقلبي طفايّة حريق
باط الكاست فجأة في يومين

ف مشيت ادندن كل شئ يخطر في بالي..

برتم رايق أوبطي

"عَجِبْتُ يَا زَمَنَ-مَنْ-مَنْ لَكَ

آخِرَ إِزَاةَ أَشْرِبَهَا تَخْلَصَ مِنْكَ

راعي اننا بنشرب ونتمزج سوا

كان من نصيبي البُقْ ده.. مَشْ بُقَّكَ

عَجِبْتُ يَا جَدَّعَ-دَع-دَع لَكَ

بتميل ل ناس ماهيش بتميل لَكَ

وتحب واحدة بكل قلبك تسعدك

تطلع ل سوء الحظ مش بتحبك

ع الحالة دي كل أما تبقالك عَوَزْ

حَظُّكَ مصاب وباحتقان حاد في اللَوَزْ

بتفش غِلَّكَ شد في إحجار الجَوَزْ

خدعاك وطلعت عايزة هي تشدك

"فك الزحام..

لكن وانا خلال الطريق.. صادف كمين

واقف عليه ظابط غشيم

-سألني إسمك إيه ومين؟

=قولتله فلان الفلاني -زغطة-.. ابن الفلان

-قالي شارب إيه وإلا!!

-يا باشا فايق.. في السليم

ماكانش عندي الخُلُق اجادل..

وارمي نفسي في مشكلة

ف بإيدي من جيب الجاكت..

طلعتله الوش اقديم!

باب موارد

في باب موارد ع اللي ضاع..
إسمه "الأمل"

هو السبيل علشان نعيش
نبضك في قلبك..

باب موارد ع الحياة
هو اللي بيخلّمها تمشي.. ماتنتهيش
في باب موارد في الخصام..
إسمه السماح
والأ تأثير الزعل.. ممكن يطول
والدعوة تفضل..

باب موارد ع الرجاء
والرجاء بيكون موارد.. ع القبول
الفجر دايمًا.. باب موارد ع النهار
والصبر دايمًا..

باب موارد ع الفضول
كلمة "بحبك"..
باب موارد ع الحبيب

والعلاج أبواب موارد..
ع الشفا بوصف الطبيب
الحنين للذكرى يفتح..

باب موارِب ع الرجوع
والزَعَل في القلب جايِز..
باب موارِب ع الدموع
والشبابيك البريئة..
جَوَّة زنازين السجون..
باب موارِب ع الطلوع
لازم يكون في باب موارِب ع الحاجات
يدي الأمل
قبل أَمَّا قطر العمر.. يتسرّسب، يفوت
لوجت في لحظة إتَقَفَلِت كل البيبان
وارد..
نموت!

75%

آخر حاجات

آخر سيجارة ماشرتهاش .. تعبالي صدري
آخر طريق ما سلكتهوش .. كان ده الأصح
رجلي اللي مابتعرجش مي .. مابقتش تجري
آخر علاقة ما دخلتهاش .. سايبالي جرح
آخر دموع ما نزلتهاش .. بليت قميصي
آخر إزارة بيتر لسة ماجيبتهاش ..
تؤلاني ليه ؟
كل اللي انا ما عملتهوش ..
إزاي باعيشه وأمر بيه!
مريض بأزمة التفكير في تفاصيل الأمور
لدرجة اني باتعصب عشان ..
موقف ما كونتش ند فيه
أو حتى كان مشهد خيالي بألفه ..
واليوم يعدي في إني بتمرّن عليه!
اضحك واعيط واجري واسكت..
من مفيش
صعبان عليا..
كل شئ ما بدأتهوش
أو تجرية مدخلتهاش
فبقيت باعيش جوة اللي لسة ما عيشتهوش
واخرج بتأثير أي مشهد مانتهاش..

أَوْ حَتَّى بِمَزَاجٍ مُخْتَلِفٍ
مِنْ الَّذِي سَرَّبَ مِنْ خِيَالِي عَلَى الْحَقِيقَةِ
خُلَّانِي أَعِيشِ .. آخِرَ حَاجَاتِ مَاعْمَلْتَهَا ش!

حسب الظروف

تفرق كثير قوله " يارب " ..
حسب الظروف!
لو قالها مسجون في انفرادي
غير اللي ماشي وقالها عادي
من اللي قالها وهو نايم ع الرصيف
واللي مدد ع السرير
لو قالها شخص فقير جعان..
ماعهوش رغيف
غير اللي قالها عن شبع
لو قالها شخص مدين له حق
غير لو هتطلع من مدان
من اللي مادد إيده علشان شغلته
واللي مادد إيده عاوز
من اللي سكت سكته
واللي وسط السكة غارز
م اللي بيعاني ..
من الزاني
من الباشا
من الحشاش .. من الهلفوت
من السُكري
من الساجد

وم الي اتلفُوا حول تابوت
من مريض له ناس وعزوة
ومن مريض مالهوش سواه
من رئيس له جاه وسلطة
أوجبان طالب جماه
من وحيدة ومن وحيد
م الي مكسور مش سعيد
م الي متغرب عن أمه
والي بتحضر عشاہ
من عجوز قادر يكمل
من عجوز عكاڑه تاه
من مزارع أرضه باريت
أو مزارع أرضه صاريت
أو مزارع مش معاه
تفرق كثير كلمة " يارب "
من ده لده .. أودول ودول
وهما هما أربع حروف
لكن يجوز الأولوية في القبول..
حسب الظروف!

ما أشبه اليوم.. بالبُكا في الأمس
قسوة بُكايا بالحواس الخمس!

ماحدث افكره

كان شخص عادي..
أو أقل كتير
"بُكرَة" كان أكبرمخاوفُه في الحياة
بكرَة بالنسباله يبقى..
-هدمَة بايْتَة في حُضن فار
-أكلَة بايْتَة.. نتشها من بُق الكلاب
-كل يوم يبروح يقابله في المطار..
يلقاه مجاش
-حجة ضايعة من اللي غاب
بكرة بعد ما كان أمل..
أصبح سراب
مرالشعورده في قلبه وكأنه..
غرقان في عرض البحرير اقب..
مركب نجاته بتسرق منه!
أو خزنة فاضية في ذخيرة محارب!
راجع دفاتر حياتهُواكتشف إنّه..
عدد موتاتهُ في الحياة.. قد التجارب
كل بكرة يقول هيبقى يوم جديد
ولابد يبقى في فرق واضح عن ما كان
حتى "النهاردة" .. كان في يوم "بُكرَة"
والنهاردة..

توأم امبارح في نفس الحزن والخذلان
كل يوم بتموت عزمته قصاد عينيه
ويشوف نزيف جرح المعافرة بين إيديه
يمشي جنب الحيط ولو طال يمشي فوقه
يتخّض أول ما يقولوله.. "بكرة ايه؟"
يصعب عليا راجل زي ده.. يفضل حزين
مخادش نايئه من الحياة غير حزن بس
شايلى في قلبها الضعيف.. ألم قلوبين
ويمّي روحه في الخيال بحياة
يصعب عليا يعيشها في الأحلام
كل يوم يسرّد قصاد نفسه الخسائر
وكل يوم يحزن في نفس الوقت..
يستسلم.. ينام
يفتح عينيه ع الدنيا تاني تسد نفسه
تجرح عينيه يضطر يقفلها
كل يوم بينقّي لبس مطالتهوش هزايمة
وكل يوم بيتوه في عمايلها
مات من يومين.. إنسان
وما حدش افكره..
غير بس قطّة في مرّة أكلها!

في قلب الحرب

هاننزل بالسلاح ورفاق
برغم إن العدد قِلَّة
ورغم ان الفساد ألافات
لابد نعالج العِلَّة
وجيش جراثيم .. مالوش مِلَّة
مريض بيهم وطننا .. وفاق
رصاصنا في جسمهم ميسوط
هَدَف واحد ..
شعار واحد ..
" يا إمَّا يموتوا .. يا احنا نموت "
قلوبنا كأَنَّهُم واحد ..
قلوبهم مَيِّتَة وفاسدة .. في جسم "تابوت"
يموتوا .. الحرب مابتخلَصش
ولو وقَّعنا 100 جُنَّة
بننْهَج بس .. مابنتعَبش
نقول فوزنا .. يكون لِسَّة
نعيد الحرب .. مابنكسَبش!
ونرجع تاني للقِصَّة
بيفضل حالنا كما هو
جمال في الإعلانات ثابت
سواد الظلم من جَوَّة

وبعد ما فات يجوز ساعة
بقيت ع الحرب متعود
سمعنا صوت غريب يقول :
" خلاص خلّصتوا .. هتقوموا "
نرد نقول له " هانزود "
يقول " الأجهزة إتحتجرت "
اقوم مع إني مش باخسر
زعلت عشان ماليش حيلة
يادوب باتعب وباتحسر
لا ميني حاربت علشانها
ولا ميني رفعت سلاح..
في أي حروب تطهرها
وفوزت في موقعة خيبر
وأخري فضلت في اللعبة
باحرروطني م السايير!

بقيت بخاف..
زي اللي أجر شخص يبجي ويقتله
ورجع في رأيه ثانيتين قبل المعاد!

أبسط كثير

أنا شخص بسيط
ضاعت "نفسي" إمبارح مَيَّ..
في زحمة مشاوير
في بساطة أي شهييق وزفير
و أبسط من أي خصام تافه
والكورة ماين رجلين "ميسي"
أولفظ "باحبك" من واحد..
قالها لـ ١٠٠ بنت
و ابسط بكثير
بحتاج لـ حاجات تبدو عادية
زي الطبطبة بالإيد في الحزن
ولو مانفعش..
يگفِّي كلام
لـ الحُضن اللي بيختصر العُمر
ولو مش حُب..
يكون في سلام
الحُضن اللي يوصل لـ سلام
وهروب م الوقت..
وم العالم
والفُرص الضابغة على الفاضي
من أي طريق آخره الماضي

أواباب أحلام.. يطلع فاضي
حُضن بإخلاص
م اللي يوقّر شرح الأحزان..
ويطّيب أي جروح.. جوّاه
الحُضن إن كان صادق وخلص
ل الشئ الخام
لمطري غسل روحنا من الضيق..
قبل الشارع
دعوات تدخل م الباب على طول
ولا تطلع يوم ويكون مقفول
ل عينين بتقول
ومقص يشيل بعض المسافات
الي أنا محتاج إنّها تقصّر
ويضيفها لبعد إختارته يكون..
ف يزيد بُعدين
ويُقّص الصور الي ما كملش الناس فيها
وبدال ما أرميها..
تعيش بَعدين
ل حُقن تسحب مني الأوهام
لبداية تدوم زي ما هي
ونهاية تليق بحاجات حيّة
من غير ما تخلي شعورها السام!
لكلام يتقال من قلب ل قلب
بدون ما يمر على شفايف
"أنا جنبك" لما احتاج لصديق..

أوافقِ شئ
و"معاك" لما تفوح الوحدة..
من روعي في وقت ما اكون خائف
"خَلَيْكَ" لو متردد أمشي
وإيدين تمسكني في أي فراق..
ل الكذب اللي يعدّي الأزمّة
ل صباغ يشاورلي على السكّة
التوهّة رباط..
و اتفكّ لوحده من الجزمّة
محتاج ل إيدين تربطه ثاني
و أنا إيد واحدة وملهاش لازمّة
محتاج ضحكة آتقابل بيها
ول صبر لا ينفذ باستعمال
ولا يفنى لو اليأس إتَمَكَّن
ولا بنت تكون شفا للعلة..
والألم إن زاد.. تبقى مُسَكِّن
وضمير ثاني
ل موسيقى في محاليل الجلوكوز
بتغذّي الروح أحسن منها
ول آية الكرسي..
تفكّ المتلعبك فيا
ول صورة يبان فيها ملامحي..
لو حقيقية
ول هوا مافهموش ثاني الأكسيد
ول عمر جديد

ول كلمة "أنا جنبك" .. تؤكد
ل مكان ما فيموش شئ مش شبيهي
أساتيك تمسح تجاعيد جبهي
وجناح مكسور .. مش شرط يطير
أهي حاجة بتجبر بالخاطر ..
وتهون سوء لحظات اليوم
غفران عن كل ذنوب تقصير
وذنوب غيرها
وحاجات أبسط من مد الإيد
لول آخرها
وعشان أبسط من كدة بكتير
كات أقصى طموحاتي إني لو ..
جه يوم وكان صابني الشلل
ألقى اللي يديني الدوا ..
ويزق لي الكرسي العجل!

زرار الفضيحة

خارج من الشباك ذليل
عريان ولايس أغلى انواع الندامة
إيديه اليمين ..
شَّمَاعَة لهدوُمه اللي فوق..
والتانية جَزَامَة
واقف بدون قصده وبدقصده
على حافة بين الشباكين ..
بيتابع الدايرمايين.. رَبَّة خيانتُه
وبين ضَحِيَّتِهِم "شريكها المُحترَم"..
- جوزها البرئ -
وكان قلبه في صدره كُتْلَة مَلْغَمَة
عدادها في إيدين جوزها هو مَفْعَلُه
وزرار فضيحة في إيد مُعْكَر صَفْوُهُم..
هيفَجَرُه
قُدَامُه حَلَّين إنتحار
يا يَنْطُ جَوَّة ..
يعيش وقاتلاه ..
نظرة الزوج -الرصاصَة-.. ودمعته
يا يَنْطُ للشارع حفاظ على سُمْعَتِه
بعد اَمَّا يَلِيس بدَلِتُه..
وَضَمِيرُه يصحى يَخِيرُه!

فوق السرير..
صيدة في قفص مفتوح ومن كل الجهات..
ولا مفراً!
عرقانة نشوة وخوف
وكان جه وقت الحساب .. والجو حر
كانت يتدأرى في لحاف..
كل أمّا بتحاول تشدّه .. رَعشَة تزلزلّه
الوحدة إبليس تاني بيوسوس بشر..
ويبدأه
شيطانين كفاية يوصلوها..
لوضع لا تحسد عليه
جوزها ان شاركها الوقت ده
كان سهل جداً يحرقه!
بيغيب عشان يقدريلي لوازم العيشة بسلام
والإهتمام
يعمل مكالمات كل يوم
يسألها: "هااه .. محتاجة إيه؟"
ويجيبلها
كان هو ده ذنبه الوحيد!
مُناها لو إن السرير..
يتشق ينكربلعها
إحساسها صعب تفسره
في خليط ما بين ..
الإنتصار للرغبة..وجريمة الخيانة ووقعها
كل اللي شاغل بالها:

"هو إزاي وصل في اللحظة دي؟"
حَب يفاجاها بانهم خارجين سوا
وهي عاملة مفاجأة من غير قصد لها
يا تموت بإيدُه ..
قانون في صفُه وينصفُه
يا تموت ورا قناع الفضيحة ..
وهو قادر يكشفُه
بعد امّا تليس أحلى فُستان عندها
علشان تخفّف مُر إحساس الخيانة ..
وموقفُه!

جوزها البريء .. شاعر
وكل ما في الأمر ..
إنه تخيلها ..
بتخونه مع غيره
عنده صداع مزمن .. ومريض بداء وحدة
والشك وتأسُّه
ف تخيل المشهد .. وجسد الطرفين
صعبت عليه نفسه ..
مأوصفش إحساسه!

في حاجات كثير تشبه ل بعض
ويبقى بينهم فرق فج
زي اللي سافر للحرم قاصد يتوب..
وماتتقبيلش
وحد مات كان قلبه واخذه يروح هناك
وبتكتبله يانه حج!

لو تَعْرِف

دور اللي في نهاية طابور الباسبورات
مستني رد يا "آه" يا "لأ"!
واللي متمرط في جلسات المحاكم.. بالشهور
محتار هيبقى الحُكم باطل ولّا حق
واللي متلفق له تهمّة..
مصيرُه بين..
هل هتضحكه البراءة..
أوتداري عينها عنّه فتسجّنه؟
قلق اللي فجأة حبيبته غابت..
والعقارب في الساعات هتجَنّنه
واللي في المستشفى مستني النتيجة..
اللي له مات ولا حي؟
ومايلاقيش ولا حد يبجي يطمّنه
خوف العساكر لما قالوا الحرب بكرة
سهرُوا طول الليل من الخوف والقلق..
والعدو ماشنّش هجوم
زهق اللي واصل بقاله ساعة في المعاد
ماعرفش يستنى اللي جايله أويقوم
واللي كان عايش حياته في الذنوب
قرريتوب..
خايف تقوم بدري القيامة

والنتيجة هتبقى جنة ولا نار؟

لو تتعرف..

كل الإجابات الضروري.. بدري حبة

هتبقى أهون لو سخيفة..

من مرار الإنتظار!

أمرإزالة

الحُزن بيدور علينا بقاله فترة
وسأل .. وصل
من يومها مانسيش المكان
بيزورنا باستمرار عشان..
الإختبار..
إنك تحس بحُزنك .. حي باستمرار!
لو كنت باضحك بس فجأة بقيت كئيب
أهوده النصيب ..
يشبه لدوسة على الزرار
تكرارل ترتيب الحاجات - عشوائي بحث -
تلاقيها ماختلفتش شئ
أوأي شئ بتحاول أنك ..
تبقى أعمى وماتشوفوش
تلاقيه في قرنية عينيك
ولا تملك إلا قليل من الصبر القليل..
والإنتظار
واقفين طابور للعرض قدام الحياة
وانا بوست رجلين المرض.. وإيديه ودماغه
مانكونش فرد في قائمته..
وطلعنا أول الاختيار
في حد زاره الموت في شقة جنبنا

رغم أنّي قاعد قبله مستنّي!
كان أولى بيه مني ؟
ما عرفش فين انا م الطابور
والإنتظار.. إحساس سخيف
حاسس كإني مكسور منّي حنّة ومش لاقها
وبخيبة أمل..
زي اللي لقي ديلة خطيبته..
صدفة..
على الرصيف!!
زي الكفيف..
يتقاله بكره هتشوف الجميع
وببيجي بكرة بضلمة زائدة عن اللي فات
شدّيت على قلبي الشريط الاسود زعل
وما فيش مقص شجاع وجازف يقطعه
الموت عدو، مريح، وفي
ساعة ما تشتد الأمور القصوى بيك..
بتصبر بعه
تلاقيه في إيده زيارة "رحمة ربنا"
ما تجسهاش.. إلّا أمّا بيعين له يجيك
حسيت وجوده بقالي مدّة في الجوار
وما خادش حد!
وكأنّه أمر إزالة ل بيوت ماتبتتش
أو ثانية تاهت جوّة ساعة..
لمّا بتلاقي المكان
بتدق ساعة الدنيا إن في حد مات

ويقل تعداد الرِّقَم بالوقت طردي
مع كل ثانية تأيية توصل في الساعات
الدنيا تمشي ..

العزا بيقفل عشان الشيخ بروح
والفرح سهران عشان ينسوا العزا
الدموع بتكر خيط الحزن حبة
والضحك منديل الدموع
وهكذا ..

دايماً في رقة بتداري الي مقطوع في الحاجات
بتسيب أثر ما يحس هوش غير صاحبه بس ..

والترزي والخيط والعياط
ما تسيبش إيد الي انت ماسكه
قبل ما توفّي بوعدك كلها
أو تكفر عن جروح سببتها
من غير ما يبقى نزيها دم
وتعيش مطارد من ضمير بيأنيك
قبل ما تعيش الحاجات وياه بصدق
وقت الفراق لمح البصر ..
كلمة "ياريت" سم في حياة هيعذبك
لو كان بيدي ..

كنت غيّرت الطريق للبيت بتاعنا
وكننت علقت المشانق للمرض
وكننت توهت الثواني في الساعات
او كننت وديتها ل مكان غير المكان
أو تدّخلت في مصير بعض الحاجات

وعشان كدة..
أنا شيلت قلبي في إيدي علشان مانسأهوش
بالغلطة مع بنت في طريق
ولّا العياط يهت عليه ويمسّخه
ولّا الظروف اللي احنا فيها .. توسّخه
وفي وقت ما تحين الصّدَف
هضحك و اقول للعالم اني مبسوط
وعشان إذا الموت زارني ..
أقدّمهوله جاهز
واكسب الوقت اللي اسلّم فيه ..
على الحاضرين..
واموت!

في حروب ماحدث أدرك بيها..
غير اللي فيها
وحروب مابتناش ل غريب
وحروب مرض
وحروب فراق
وحروب وصولك للفرص
وحروب حياة
وحروب كثيرة .. إلخ، غيرها
حرب الرصاص والدبابات..
دي آخرها طلقة
أما الحروب الثانية مش معروف آخرها!

سوبرمان

أي أساطير مهما قالوا زمان عليها..
ما هي إلا خيال لطيف
إبن الهزيمة بيخترع أي انتصار
وأي تلكيك يجعله..
يستطعم الباقي في دلع طعم اللي جاي..
ويلم أوراق الخريف
وان جيت سألت..
مين هو سوبرمان حقيقي
فهتلاقيه..
هو اللي بيقاسم رصيف شارع في نومته
واللي فصل لك حياتك من سنيته
بعض عمال النظافة..
اللي بيلمؤوا التراب م الأرض زي..
ما تنقي ستات البيوت.. حصا م الرز
العسكري الواقف بيحرس ع الحدود..
وعرق جبينه
وكل واحد داس عليه العمر ومكمل حياته..
بألف طظ
أو موظف..
خلّى كل حياته تبقى..
جبر عشوائي في دفاتر

واللي بيدوقوا بعينهم..
طعم أكل الإعلانات
المحرومين من كل شئ
هتلاقي حواليك لو فتحت عينيك بحكمة
شخص مش دايما يبان لينا بسهولة
شخص دايما دورُه مجهول في الحقيقة..
ويتنيسي
هو ده اللي يليق عليه دور البطولة!
شعب طيب..
م النوع اللي بيشفو نفسه سوبرمان..
عشان..
كان عدى شخص عجوز طريق
أوقام ل واحدة في المواصله
ساب مكانه ل حد غيره..أولى بيه
أو عدل سلك الريسيفر
ساب منابيه لحد بيحبّه بصحيح
أودل حد لأي حنّة
صلح اللمبة اللي باظت..قصاد عياله
بيبقى شايفه الطفل..
سوبرمان خياله
وشخص خارق
هي تفاصيل تافهة جاي
بس طعم الإنتصار لو كان بسيط
في وسط مجموعة هزايم..
بيبقى فارق!

شبهك أوي

يقدر يكون..
واحد غريب
صاحب وفي
بواب عمارة في حطة م القاهرة
محامي، دجال.. فلسفي
بياع هدوم
صاحب نفوذ
وانت.. وانا
واحد من المارة بجوارك كل يوم
أب وصديق
ومصوراتي.. فوتوجرافي
واخذ شهادة دكتوراة في صدق الشعور
لدرجة أنه لو كذب..
هتصدقه
الكلمة عقد ان قالها هو
واللي برّاه زي جوّة
تحس رعيشة صوته لما تشوفه خاف
الحب عنده أصيل وشهم..
يشبه خضار الأرض والمطر القليل
بعد الجفاف
بيشف تعابير البشر.. من وشهم
أبسط كثير، علشان كدة.. بيوصل لهم
يظهر لهم..
حسب القلم ما يشكّله
يا يوارى حزنه عن الجميع

يا يوري حُزْنُهُ للجميع..
ويعيش معاهم كلهم نفس الألم
ويسلِّف الناس شئ ماظُنِّش كان معاه..
إسمه "الأمل"
يتحط في مكان يشبهه..
ويمثله
وقت الربيع سيكون ثمر
في الليل تحسُّه يكون قمر
بيشُد أزرَك في العزا
طبال في أوقات الفرح
يقدر يخَلِّيك حاسس أنك..
وببساطة، اشتقتله
في عينيه سيناريو الفيلم مش فوق الورق
ف تعيش معاه... ويعيش معاك
ما تفرَّقوش عَنْكَ في شكله ومظهره
وما يفرَّقوش عَنْكَ غير الإسم.. إن فرَّق
شبهك أوي..
بتشَم ريحة الفَرِّبتفوح من عينيه
وتشَم من قلبه الأصيل.. صدقُه الذكي
مو هوب بشكل..
يشبه أوي لكل الفئات..
وعشان كدة
ممکن تنادي الناس بإسمه تقولهم..
"أحمد زكي"

50%

هتلر ماماتش

موجود..
في كل حنة.. ووقت
قاتل.. وظالم.. وله نياب سامة
موجود في زي المدني.. متخفي
ظاهر في زي الدولة.. ل العامة
بيعلم الناس يقتلوا في بعضهم
وان جاعوا ياكل بعضهم.. بعضه
هتلر ماماتش.. ولسة بيموت
وفكره حي.. وهو ده غرضه
هتلر يلبس وش ناس تانيين
علشان يموت فيهم الإنسان
ماتفرقوش عن غيره في المظهر
بيشوف عدوه يهودي أيًا كان
بينتصر مع كل شخص يموت
يحزن إذا خيب رصاص أمله
وتجيله نشوة مع انتشار فكره
وكانه إبليس.. بس خد عمله
في ناس بتقتل بعض في الشارع
والطلقة وردة بيها دوها لبعض
كل اما تبقى عداوة بين اتنين
واحد يجيب ل الثاني باقة ورد

الشر فكرة وعدوة زي المرض
والناس ضحايا النفس أو غيرهم
بياخدوا من دم الجميع الأمل
ف يبقى سهل الخوض في تفكيرهم
الناس بتقتل بعض مش مشكلة
الناس بتطلب حقهم أزمة!!
بجريمة تبقى براءة.. لو بنفوذ
غلبان هتضرب راسك الجزمة
موجود في كل مكان.. مالوش آخر
مقنع لدرجة.. كله يبقى مطيع
مين اللي خدع الناس بموت هتلر
هتلر يقتل لسة ب إيدى الجميع!!

الجنية

حَطَّ "الجنية" في جهاز..
"تحقيق الأمنيات"
وإتمنى يبقى الوجع
يخف.. ما يطولش
ما يزيدش لـ مواجع
فـ يلاقي نفس الحال
ويجس سوء حظّه..
يلقى "الجنية" راجع!

يتمنى بنت بحسن
تمسح عرق معاناه
تخفي الوجع في غناه
تشبه فتاة أحلام..
عاش عمره نفسه تكون
حقيقة.. ومقابله
وبعد حبة وقت..
وقال هشوفها خلاص..
لقى "الجنية" ويّاه!

يتمنى يبقى سعيد
مبسوط، غني، وقادر

ساحر في أيده الحل
بيحوّل المشكلة..
بسهولة لِمَهازل
يدي الحياه سحرها
تغري الي متخاذل
وقيف وقال تعويذة..
ترضي الغرور جواه
لقى "الجنيه" نازل!

يتمنى وقت الفراق
يبقى الطريق مسدود
وتلف ترجعه
أو لو هتمشي خلاص
ما يكونش قلبه معاه
ويدق مش مقبوض
مشيت وقال "راجعة"
زي امّا كان مفروض
وبرغم كل الثقة..
بيحط ايده في جيبه
لقى "الجنيه" موجود!

رمى "الجنيه" مرات
ورجعه كام مرّة
زهق رماه.. برّة
مارجعهش له تاني

وبعد فترة إندهش
قال سوء تفاهم.. عام
والغلطة في استخدام..
مُسْتَعْمِلُهُ العادي
قام بص في الكتالوج
طلع إنَّه "آلة زَمَن"
وصاحبها مش محظوظ
إِتَوَقَّى دون تجرِبة..
مات جَوْة قلبه فضول..
وصنعها ع الفاضي
وعشان كدة منطقي
يلقى "الجنيه" على طول
طلع الجهاز معمول
بِيرَجَّع الأحداث..
كام ثانية للماضي!

إنت وضميرك حربكم في الخفا
إخسر له قبل الدنيا ما تحوّلك
نفسك بدون تأنيب وقعدة صفا
هتمص دمك قبل ما هتقتلك
نور الضمير لو جه في وقت انطفى
جبل الفلط في السكة هيكعبلك!

كُنَّا جَهْلَةً

واحنا جهلة..
كنا ما بنحسبش حاجة
كنا ما بنسألش ليه وازاي وإمتى؟..
وننتظر نور الإجابة
والفضول درجة حرارته.. كات بسيطة
كنا أبسط من "يارب" في لسان الغلابة
وم الكتابة..
والسهر ومن الكتابة
كنا ما بنشغلش بالننا..
بالعربة اللي تاهت من مغنى
كنا بنقول إن صوته لمس قلوبنا
كات عقدنا أقل بكثير واحنا جهلة
من عقدنا واحنا بنداري في عيوبنا
والطموح كان حتى أبسط..
مش سهام نزلت في بورصة
والزعل على كل فرصة
والتأثر والتعثر.. والتحايل ع الحظوظ
كنا بنعيش الحياة زي امّا تبقى
مش بنأمل شئ خيالي.. أويجوز
ندعي يومنا يفوت خفيف..
ونموت خفاف

نختار حاكمنا بالقلب النضيف
ولو اتظلمنا..

نسب حقوقنا أمانة عند الله.. فترجع
لما يبسلم ربيع الظلم رايته.. للخريف
كل ما يزيد التطور..

كل ما المسافات مابيننا بتبقى أكبر
كل ما الأيام بتتعدد زيادة
والفلوس أخطر سلاح ع الإنسانية
والحياة..

سرعتها بتزيد كل مادا
تدوس على الباقي اللي فينا..
وتصيب المشاعر بالبلادة
وانعدام القلب بالوقت انتشر
كنا جهلة..

في الحياة مش في العلام
وبقينا جهلة..
في إننا نفضل بشر!

منظور مختلف

"سُبْحَانَ رَبِّيَ الْأَعْلَى"
-تَلَّتْ مَرَّاتٍ-

عارف يارب ..
حاسبس بـ إني بقيت بـ رجل ونُص رجل
وعشان اهْوَن موقفي ..
قررت أبْصُ للموضوع بـ منظور مُخْتَلِف
لَمَّا امي قَالِتْ إوعى تَغْلَطْ
دَه يَزْعَلْ رَبَّنَا ..
خَلِّيك حَذِر!
ممكِن يكون ده عقابي مثلاً
أونتيجَة لـ بَعْض غلطاتي الكثيرة..بدون عدد
"أنا باعتذر"
العارِجَة ممكن يبقى تفسيرها الخيالي..
بـ إن ليها صلاحِيَّة وتاريخها يجوز خِلص
وان الخشونة في رُكْبِي ممكن تبقى مثلاً
عايزة تَتَزَيَّت وزيتها..
الأصلي رَبَّاني ونِقْص
وَلَعْتَ شمارِخِ اسْتِغَاثَة
وقولت : "يارب الشفا"
خَلَّصْتَ مَخْزُونِ التَعَاْسَة .. على الألم

وَدَفَعْتَ ضِعْفَ التَّكْلِيفَةِ

تعبان يارب ..

وكل خَطْوَةٌ بَتَبْقَى أَصْعَبُ مِ الي فاتت..

والخسائر مؤسِفة

السَّنْدَةُ على إيد الصُّحَابِ..

توصيلةً إلى حين الفَرَجِ

باكره وجود عُكَّازِ عِشَانِ ..

مالهوش لزوم..

غير زووم على وجود العَرَجِ!

إحساس بـ عَجْزٍ.. لَكَيْتِي مُجَبَّرِ

نَفْسي أَقْضِي اليَوْمَ طَبِيعِي..

بدون ما أَقول " آه "

أو أَحْسَ بـ إني فاقِدٌ لِلأَمَلِ

والعِجْزُ يَبْزِدُ كل ما أَكْبَرِ

يارب .. إقْبَلْ دَعْوَتِي

وسامِحنِي على باقي الكلام

" الله أكبر "

مافيش خرابة هتلقى فيها نفاق
مافيهاش غني وفقير أو بهلوان
لا عمري شوفت زبالة بتتافق شبيهها
ولا ريح كرية قال هبقى يوم برفان

دون اهتمام

الموت حرامي إيديه خفيفة
بينشل الروح..
من محافظ ناس بعينها في كل يوم
الناس بيبقى..
في عينها كلمة "موت" بجبر مابتشوفوش
وتبان في لحظة كبيرة من غير أي زووم
في حاجات كتير بتموت قصاذك كل يوم غير البشر..
دون اهتمام
يلاحظها شخص مريض بتفاصيل الحاجات
الشاي لما اتدلق امبارح م القهوةجي، مات..
واتجاب واحد عايش غيره
والشجر اللي اتقطع علشان.. كتر خيرُه
الفرصة اللي في إيدك روحها
ممکن كان غيرك أحيائها
والذكرى اللي انت بتنساها
الثانية اللي بتخلص دلوقت..
بتفتح قبر..
لثانية كمان تبقى معاها
الورد اللي اديته لواحدة..
مايتسقيش قلبك..
فما بالكَ بشوَيّة ورد

الخطوة اللي مشيتها ب خذلان
السران جه له وقت و بان
الحُضن اللي ماينهيش أحزان
والنص اللي قتلته بطعنة.. بملك في السرد
في حاجات بتموت دايمًا حواليك
من غير ما يفرق موتها أو يتحس بيه
ده الفرق ما بين كاتب بيعيش..
والفن بيعكس تأثيره
بيحضر عزاء حاجات ماتت.. من تفكيره
والشخص العادي الغير مهتم
اول ما اندلق الشاي فوراً..
راح طالب واحد شاي غيره!

بالتة

قلبي من فرط السداجة..
بيختلف لونه الأساسي..
كل ما بيطرأ عليه حادث جديد

....

-يبقى أزرق..
كل ما البحر يشاورله عشان يزوره..
يرمي كل همومه فيه
أو يعزّمه ..

على كاس من الماضي الأليم..بيأزّمه
-وابيض مع دعائي بيقين..
مع كل لحظة شوق لجنّة ربنا..
وفي حضنها.

-أو كاي مع أول أذان استدعا جيش
ودعايا لأمي باني نفسي أرجعلها
-واصفريجوز

ساعة ما تصحى الشمس تبدأ شيفتها
-ويشفّ لون الوردة لحظة قطعها.
-واسود ..

في كل فراق يتم
وفي شرطة على صور اللي ماتوا
وفي انهزام الصحة من جيش المرض

مع كل دمة حُزن من نـن القلوب
مِش م العيون لجل الغرض
-وساعات بيبقى احمر مع غياب كل لون
وفي وقت لما يكون سعيد
ول لحظة جـه في بالي السؤال
" إيه لونُه لَمَّا يكون حيد؟ "

**كل الدموع في عينا كات رهن الإشارة
أول ما شاور ليها حُزن شديد.. بكيت!**

بلاش تموت

بلاش تموت ..
في عيون كثير مستنياك تفتح عينين!
قول حَتَّى " آه .."
وعليها هنردد وراك ونقول " يارب "
والناس ورانا هنردد " آمين "
سيب حتى نسبة 2 من المية ل أمل..تدينا صبر
أُمَّكَ عياطها مغرَّق الآية الكريمة
و ابوك عياطه ل جوَّة واصل حد رأسه..
هاينفجر!
والحزن بالملقاط مَخْلَع ..
من قلوبنا جئت سليمة
في حاجات كثير هتموت معاك
وتعيش وراك ذكرى وعياط ماينتهيش
وهنبق عايشين ..
نطلب الموت كل ثانية عشان نشوفك
إنت روحنا ..
فاحنا من غيرك هابقي ازاي نعيش!
قوم مد إيدك في السما وبعتر نجومها
زي ما بتعمل وتضحك من مفيش
رد ع القَمَر اللي قاعد يبكي نوره
باقيله حبة نور ويتحوّل سواد
أديله ليلتين بيناديك
قوم إسقي وردك ..

بقاله كام يوم ريحْتُهُ مابتطَلَعَش مِنْهُ..
زَعَلْ عَلَيْكَ!
وارسمنا أوحش من كدة في كراريس دراستك
واحنا واقفين ..
نحصد الزرع اللي موجود برة كوخنا
وانقَص الدَرَجَات، أبوك..
مش ناوي يمنع المصروف عليك
ولا حتى يديك علقَة سُخْنَة
وبكرة اجيبلك..
كل حاجة حلّمت بيها لحد عندك
وامشي في الحاجة اللي ماوصلتِش آخرها
حتى عندك مش هحاسبك لو عملتُه
والعب الكورة اللي مابتعرفش غيرها
واحنا هنساندك في كل وأي حاجة
وان كان ع الحياة ..
إحنا انتهينا وعيشنا واتمّنعنا بيها
الحيّ مافيهوش أي مطرح للي فات..
ولا يَحْتَوِيه
العُمَرَجَيّ علينا بشويّة سنين
والباقي لو هانعيشه فَانْتَ الأولى بيه
خُذ مِنّا النبض اللي باقي ..
بدون شروط
قوم وإبكي عادي وخُذ مكاننا
بس ..
بلاش تموت!

رغم كل اللي افتعلته

دخلت شارع ..
قاصد المارين في خدمة
حُضن لوحتي لثواني..
بس حُضن بمعنى حُضن
- حُضن يا صديقي الغريب؟..
وكإنك استنيتني على باب المطار
- محتاج لحُضن جدي يا حج..مش قاصد هزار.
- شكلك شبه.. ستي الجميلة الطيبة..
حُضنك اكيد راح الاقي فيه..
ريش النعام اللي التقيته في حُضنها.
- يا أنسة!..
ممکن أدور جوه حُضنك عنها.
رفضوا الجميع ..
وجميع محاولاتي انتهت
بانتصار للرفض .. بارع
واكتشفت برغم فشلي
ورغم كل اللي إفتعلته
إني ماشي لوحدي في الشارع!

بلعب كوتشينة مع الأيام
ف اسحب شايب.. زي الخايب
والحكم يكون واحد.. تطلب:
"يوميا.. تديني الشايب!"

صاحي

أصبحت بالغ في الشعور بالألم
وحتى بالغ حدي من عدد الهزائم
بخسر حروبي مع الحياة كلها
واكسبها دايمًا بس وانا نايم
الدنيا عاوزه اللي يفوز صاحي
الدنيا عاوزه اللي يموت كسبان
ولا مرة قالت الغلبان "بطل"
وتقولها ع اللي بيدي ل الغلبان
فيها الأمل والألم بقوا نكتتين
فيها العياط والضحك مش م العين
فيها الغبي والذكي إذا مسافرين..
يكونوا أذكي..من المثقف الإنسان
إيديا أقصر من أمل خايب
والفقرزي الدم في الأوردة
تتمنى حاجة تقول ياريت تبقى
جيبك يقولك مش هينفع كدة!
مخروم يا جيب حتى ولو فاضي
مليان ب ذكرى ل اللي له ماضي
مليان هزائم ل اللي عاش راضي
وفاهم ان الثروة في الأفئدة

غلبني فقري في الحياة دائما
وغلبته ياما في المنام ب نفوذ
الدنيا عاوزه الي يفوز صاحي
الدنيا عاوزه الي يكون محظوظ
السكة أطول م الي فاكرينه
ومغامرة تمشي طريق ماتضمنهوش
مسكت خيط ل نهاية فجأة اتقطع
تمسك في غيرُه يتفتل.. ويبوش
غريبة برضو الدنيا دي بتلّيك
وتعكس الأحوال في رَمشة.. عليك
بتعشّمك بالنور عشان تعميك
تفضل كدة ويّاها.. حلّق، حوش
غلبني نَفسي في الطريق ف تعبت
وغلبت نَفسي في المنام وجريت
الدنيا عاوزه الي يفوز صاحي
الدنيا عاوزه الي يفوت في الحيط
تعبت من كتر المعافرة قعدت
وخوفت اغامر تاني ب جراحي
قتلني خوفي في الحياة دائما
وقتلته يمكن في المنام مرات
والدنيا عاوزه الي يفوز صاحي!

جول

في حد مرة ساعدني ماعرفهوش
شيلت الجميل وحفظته جوايا
وبعد مدّة كنت في المترو..
كات واحدة و اقفة في زحمة.. قومتلها
شكرتني قولت: "الإنسانية أداان"
وفي وقت ثاني الواحدة دي هتقوم..
ل عجوز في أي مواصلة باستحسان
وفي صدفة شخص بيجهل السكة
بيجي العجوز ويدله ع العنوان
ف الشخص ده يدفع ل شخص غريب
محفظتُه وقعت.. راكب الأتوبيس
وفي وقت ثاني يكون معاه يفتكر..
يفتح جيوبه رزق للغلبان
في قلوب بتحتاج برضوزقة..
عشان تدور
والخير يادوب دوسة زرار
موقف يدوسُه.. يحوّلُك إنسان
من فعل واحد كل شئ يبدأ
في حد كان ويايا إنساني
باصالي موقف حلوف شكرته
باصيتُه بعدُه ل غيري فشكرني

يباصيه لُ غيره.. والمناوَلَة تطول
حلوة الحاجات الحلوة لما تلف..
بين البشر.. يبا صوها عرض وطول
وأما الهجوم ع الإنسانية يخف
والضغط يهدى..
ساعتها نبقى نزف..
الإنسانية لما تفوز بـ جول!

25%

باب السما

واقف بر اقب دعوتي ..
إزاي بتطلع ل السما ؟..
وازاي تعود ؟
باحدِ غلط ؟..
هل باب السما هلقاه مفتوح ؟
هل ممكن يطلع مش موجود ؟
فدعيت وقولت :
" يارب رجلي تخف و اكون طبيعي "
الدعوة تمشي السكّة تعرُج..
عيني ترسم لها عكاز من بعيد
من بعد نُص السكّة تتعب
تميل .. تُقَع!
ترجع ل قلبي حروف واجرّب من جديد
" يارب مجروح..
والشقوق في القلب زائدة "
تطير بتزف..
بعد نُص السكّة فجأة.. الدم يخلَص
تتبخر.. تموت
فالأمل جوايا ينقص
" يارب غفر انك لاني عصيت كثير "
تمشي الطريق سالك وتوصل..

والبيبان متَقَلِّين!
فَاسْمَعْ شَيْطَانُ..
صوت همس ضِحْكُهُ في وداني الشمال
وعياط دُعَايا في الودن اليمين!
لو كان بـ إيدي مفاتيح لـ البيبان
كانت هتوصل دَعْوَة واحدة على الأقل
أوع الأقل أكون حاولت..
في بيبان مفتوحين
دلوقتي ليا مليون دَعْوَة فوق.. ماتحققوش
أويمكن انا برّة المدد
وواحدة جايّة في الطريق..
" يارب توصل"..
وعاوز اضيف دي للعدد!

بعد الخيانة

كل الظواهر أثبتت صدق الخبر
بيحب غيري وكل يوم..
بلاقيه راجعلي بدُص قلبه..
ونص بايت.. برّة ويّاها!
حتى الدليل ..
شعراية متبقية على كتفه اليمين
روچها اللي قطع السكة ونهاها..
من خدّه للمنديل
خربوش 3 سنتي ظاهر فوق رقبته
ذوقه اللي متغير في نوع الأكل..
وف كل الحاجات
علشان ينفذ رغبة الثانية
ريحته اللي صبحت..
ميكس مش موجود في نوع البرفانات
أصبح ممثل ..
لجل إنه يعدل بيني ومابينها
كل يوم يعزمني في مكان مُختلف
ويقولي شعري عيني ..
كان مفروض في عينها!
لأ ويبجيب كل شئ
مابقاش يقصّرزي ما اتعودت اشوفه

وزي ما بحب الخناق علشان يصلح بعدها
بقي مُحترِف..

يحضّني بس عشان ما حيسّش بالخيانة
وهو واشم حُضنها على جسمه كله
إحترت ا قوله..

بأنه طول الوقت نايم عندها
وباعتلي واحد شهيه بيقصّي الغرض
ومبرمجّه ..

على إنّه يتعامل معايا بـكُل عدل
والإحتمال لوجود غلط..

مش مفترّض "

كل الحكاية ..

باحط نفسي مكانه لوفكرّ يخونني..

مقابل إن أنا باصونه

دلوقتي إيه احساسه في الواقع..

وانا ...

باخرج أخونه!

باضحك عشان..
أجبر ب خاطر صاحبي في الصورة
امي اما تسأل فيا إيه؟..
أجاوبها بيبها.. لعلها تحس ب أمان
لو إتجمعت ب اصحابي..
ب اجاري القعدة والمواضيع..
واخبي الحزن جوايا.. وامثل زيهم بالظبط
وبتصنع واقول إفيه
بقابل خلق في الشارع..
بسُرعة برق..
أكون راسم مجاز ضحكة
ومع تصوير بطئ جداً..
برجع نفسي للوضع اللي كنت عليه!

اللي متوفّر قصادي

عريان مجازاً
واللي متوفّر قصادي
" الحب " كان..
قميص جميل!
ومتفصّل لي على قد المقاس..
مالهوش مثيل
و" فراق " چاكت..
- واسع أوي -
في عزّ البرد بيعري.. ما بيدفّيش
عينيا شافت في المراية..
الحُب بيغطيه فُراق
زعلت .. بكت
أما " المَرَض "..
كاب لونه إسود..
عكس تاج الصِّحّة بعد التعديلات
" الفقر " أضيق بنطلون
مليان رُقّع .. طينة وتراب
مجبر عليا اني البسّه!
و" ظروف " شراب..
مقطوع من الكعب . اتهرى -
و" الخوف " بيتمثّل في جزمة وضيقه

بتخطي بيا الخطوة .. وتعود ضِعفها..

كعبي إتبرى

و" الحُزن " نضارة نَظَر

من غيرها.. بيها

الدنيا ظاهرة مشوشة.. وماتُحتمَلش

و" الحظ " ساعة بدون عقارب ..

والحَجَر ما ييش تغلش

والله مش قصدي اعترض

ولا عُمري فُكَّرت في كدة

انا بس مش عارف أعيش..

بالطقم ده!

10 جنيہ

في جيبي 10 جنيہ يادوب
هَقْصِي بيہم يوم جميل..من غير حساب
أقدر اقلع بنت حلوة.. بالعزومة ع الغدا
بدون ما تحرج قلبي وتقول "الحساب!"
وادفع مواصلات الطريق رايع وجاي
بالتاكسي..مش راكب رجولي
واقدر أدوق..
عصير من الطازة النضيف..
مش شاي خشب..واقتل فضولي
أقدر احضر فيلم سيما بتذكرة
مش بس اخمّن م الأفيش
واخش حرب جديدة"محتار أعمل ايه؟"
غير حروب النمل على..سكرو عيش
أشوف بعيني الدنيا م الزاوية الجميلة
وانسى خوفا من الهلاك
واڊي شحّات اللي ممكن يبسطه
ماخرجش جيبي بسخرية..
أو اقولہ "خدني اشحت معاك"
واجيب هدوم غير اللي باشت..
القميمص والبنطلون اللي في دولابي
واڊي صاحبي فلوس تساعده..

يشبّع الدين مدّة أطول
واشتري مسدس واموت.. إكتنابي
واخلي بطني تخشّها أكالات جديدة
برضو ماتشبعش كل يومين قصيدة
واشوفي شقة مختارها بمزاجي
براحتي مش مجبور عليها
و اُبص من فوق الأمانى المستحيلة
ع اللي عدّي.. واعيش فوقها
واقول كفاية اليوم خلاص
محتاج اريح رجلي م المشي الكثير
بعد اما ضاع باقي الفلوس.. في الميكروباص
واقولي لو كان ده بصحيح..
كانت حياتي هتبقى غير
فقير ياريتني.. في أيدي أي حلول
جايز نهاية الصبر خير
الفقر مش عيب إنما..
العيب خيالك يبقى مش قادر يطير!

كل الهدوم الجديدة بعد قص التيكِت..
بِتَبْقَى مُسْتَعْمَلَة
زي الكلام الجديد
وزي أول دموع غسلت عيين
وكل أول قطفة للأشياء
زيننا..
مع كل فقد..
بيشيلوا من فوقنا التيكِت..
وقت الفراق!

مبقاش نضيف

كنت شخص برئ وطيب
الهوا اللي في قلبي عمره ما كان ملوث
كنت باضحك
كنت اقول للدنيا.. ها؟ فين اتفاقنا؟
وانام معيط..
واصحى ناسي الإتفاق
كنت بفرد إيدي جناحين لما بجري
واقول لصاحبي..
مين هيكسب في السباق؟
قلبي أخضر..
فيه غابات وورود ومية
ونيل جمال ساري في ملامحي
كإن حرب كبيرة قامت جوّة مِنِّي
جايبة فُطنة بنار عشان.. نداويلي جرحي
كنت بفرح لويقولوا..
ليك مكافأة عشان نجحت
واجيب حاجات تخلص و اقول
هرضى بقليلي مادام فرحت!
وأمّا اشوفها في الحوش وسط ألف
أوفلوس امسكها بعد ما أكون كافحت
إيه اللي غير من برائتي؟..وصلني لكدة

الفَقْد...وَلَا الحزن..
وَلَا دموع فُراق لسعالي جِلدي
بوسَة كانت وِيَا واحِدَة..
تحت تأثير كلمتين من جوة قلبي
ماتتَنسِيش..علشان حالتها
بوسَة شهوَة..وبنت لحظَة
بنسأها في ساعتها
كرمَشَة في صدر القميص..
كانت ب إيدها وهي ماسكاني في وداع
المكوة مابتقدرش تفرد..كرمَشَتها
حُضن طولته..ماسايش حاجة
وحُضن عوزتُه، ماطولتهوش..
سايب علامَة
ذنوبي لما تَزِيد عليا..
وخوفي دايمًا كل جمعة..من القيامة
عينها مثلاً مَّا تضحك..تبقى حلوة
ولما تبكي بتبقى أحلى
حتى لما سابتنى أَسْتفرد بحزني..
جميلة برضو
هي ذكراها الي بتكرَهني فيها
وعينها بترجَّعني احب
سطوركثير من جيبي وقعت..
الي كنت كاتبها لَهَا
حتى هي بقيت..ناسمها
بكم يكفي من البلادَة

وكدي لما بداري حاجة بنفي فالصو
وكل فرصة مسكت فيها..
بدون ما أحقق إستفادة
أو محاولاتي اللي خلصوا
ضرب عليم جوة روجي
وستي لما قالتلي ماشية.. ماجاتش ثاني
وهي بتوفي بوعودها
كل شئ اختارته لكن.. مش عاوزني
وكل شئ اختارني غصب
بدون ما اعوزّه
وتاني حزني
وقعة قطعت بنطلون..
هو اللي عندي
ولما كل ظروفي تتصدّر في عندي
ضعف ثقتي في إن بكرة يكون جميل
صبري ع الحال يبقى أحسن..
بعد "تقريباً" بقى.. "شئ مستحيل"
مكتوب عليا الحزن في خانات البطاقة
أو حياتي عشائه.. محطوطة في رغي
إيه اللي غير من برائتي؟.. وصلني لكدة
والهوا اللي في قلبي.. ليه؟
مابقاش نضيف!

أبويأ قال

أبويأ قالي ..
" حاجات كتير أبعدھا عنك
زي مثلا ..
إوعى تكذب ..
أويُفك لجام لسانك
باللي مفروض ماتقولوش
واهزب من الأرض الخيال اللي انت فيها ..
عشان ماتتغريش بيننا
وخطي ل محطّة وصولك ..
سنّة .. سنّة
لو نطّيت .. تُقع
قوم لو وقعت في خلال الطريق ..
واتعلّم العبرة المفيدة ..
تتلاشى البقع
ماتجيش اللي مع ضرب الرصاص
تتفادى بيك
حب اللي ممكن ..
تقف قصادك وتفاديك
ماتسييش قلبك ..
أوين بوفيه للزائرين
الناس هتشبع بعد ما تخلّص عليك

وَيَمْشُوا مِنْ غَيْرِ "حَمْدٍ" أَوْ "مُتَشَكِّرِينَ"
إِقْلَعْ سَذَاجَتَكَ قَبْلَ مَا تَخْشَى الْحَيَاةَ
دِي بَتِيحِي عَ الْيَ لَا بَسْهَا .. مَشْ بِتَخَافْ عَلَيْهِ
مَاتَسِيْبِشْ بَابَ لِلْخَوْفِ مَوَارِبَ ..
يَسْكُنْكَ
وَلَا حَتَّى تَسْكُنْ إِنَّتْ فِيهِ
الْفُؤْيَا لِأَ ..
الْقُرْبُ لَوْ زَادَ عَنْ حُدُودِهِ ..
يَبْقَى لِأَ
الشَّعْرَ لِأَ .. مَا تَجِيْهْشْ "
مَا عَرَفْتِشْ أَنْسَى الشَّعْرَ وَابْعَدْ
لَا قَيْتِنِي مَعَ أَوَّلِ قَصِيدَةٍ كَتَبْتُهَا
عَمَلْتُ كُلَّ الْيَ قَالِي أَبُويَا .. مَا تَعْمَلُوشْ!

يفوتني قطر العمر اقول " ماشي "
يفوتني قطر الحب اقول " ده قضاة "
يفوتني قطر الشغل اقول " راجع "
يفوتني قطر الموت .. افرّ وراه

خَلِّيك هنا

الغربة - فعلاً - بتبدأ
من لما تخرج برة باب بيتك
إلى أن تبص في وش أمك..
تبقى عُدت!

" خَلِّيك هنا..
هنا أولى بيبك
هنا لو تجوع..
نعمل قلوبنا على العشا تكفّيك
تدقّ بينا لو الشّتا قارس
تعطّش هنا .. نسقيك
هنا أولى بالعرق اللي بيمطر على الأسفلت من..
سحابات جبينك
هنا لما تخبط حد في طريق .. يعتذر
وهناك إذا اتحكّيت في كتف غريب..
يهينك!

خليك هنا..
وارضع طبعي من صدر الوطن"
رديت وقولت :
أول ما ياكل يرضعوا الأغراب
والسلطة واللمّة اللي فوق

صدر الوطن محجوز..
نقدّر نقول مُحْتَل!
كدة لما أجوع .. مالاقيش
واغرق في أيدي الطوق
يبقى الصناعي الحل!
كان لازم أمشي عشان أجيب..
طوب أبني بيه مُستقبلي
سنتين وهارجع .. ماتخافيش
بُكرة أمّا اقولك..
إني على أرض الغريب
تتضايقي حبة .. فَتَقْبَلِي

"سنتين يفوتوا بدون سؤال
وبدون كلام .. ولا حتى رد
مارجعش ليه؟
بالليل بانام
وانا سايبة قلبي على كُرتي المطار..
مستنياه!
من يوم ما سافروحي رايحة ومش هنا
فَيرد أبوه :-
"الواد مافاتش عليه يومين..
الصبر حلو"
وانا لسة بنسى ..
وقلبي حاسس يوم غيابه.. بيعادل سنة!
إوعالك تحب القعدة عندك .. تعجبك!

وإنزل أوام
فيه حاجات كثير مستنياك..
منهم أنا!
و أبوك مداري اللهفة والخوف جوة قلبه..
وف عينيه
أنا بس اشوفه .. ماتفهموش
عاوذة اسألك
ساعة ما دق قلبي مخضوض م القلق
أول ما كجيت م التعب
ماسمعتهموش؟
أنا كل وقعة وكل حزن وكل ضغطيملكك
بيجلي إنذار إنهم حواليك ف أقول:
" يارب حوشهم عنه .. غلبان..
و ابقى جنبه .. وماتسيبوش "
"

جوابات كثير
باكتيها من ورا قلبي..لوشاف!..
سهل ينطق بالحقيقة المؤسفة
ف كدبت قولت :
الدنيا هنا أجمل كثير
وكل ما اتعب .. لحظة وباحس بشفا
والشغل حلو..
الأكل حلو..
مابانامش يوم حاسس ب جوع
وشمس كديي واقفة على سقف الجواب

مع سهم مرسوم بالمجاز..
شاو ر على العنوان بتاعنا.. عليه " رجوع "
هنا كل حاجة عندي عايضة تقولي امشي
وكل شئ عندك بيترجاني اعود
إيد الوطن بتشد فيا
وإيد بلاد الرأسمال ماليالي راسي
وماسكة فيا
وطوب خيالي بيغلى سعره..
لوفوت اليوم عليا
الغربة كافرة
والحوجة للمال الغريب..
أكفروألعن مئها
والجوع ل حضن الأم كافر
..
بعد ما اتعرض الشريط قدام عينيا
وشوفت تفاصيل كل ده..
قولت مش عايز أسافر!

قيمة الأشياء

ما بنحسش ب قيمة القطر..
غير لوفات
ما بنحسش ب سنتي القُرب..
غير لما يزيد كيلوهات
ما بنحسش ب طعم البيت..
إلا واحنا في الطريق
ما بنحسش ب قيمة شئ..
غير لما يضيع الشئ
ما بنحسش..
ب قيمة كَفّة المظلوم
غير لو مالت الكَفّة
ما بيعسشش ب قيمتك حد
غير لحظة ما تتوفّي
ما بيعسشش ب قيمة اللون..
غير الأعمى
ما بيعسشش ب طعم النعمة..
غير اللي اتحرم منها
ما بيعسشش ب قيمة النومّة..
غير اللي مالوش مأوي..
غير المسجون
ما بيعسشش ب معنى الراحة..

غير مجنون
ما بنحسّش ب قيمة النظرة..
غير لما تفارقنا عيون
ما بنحسّش ب قيمة الورد..
غير لما نجيبه لحد..
أو لما يجيلنا ورود
ما بنحسّش..
ب قيمة جتة الإنسان
غير لما ياكلها الدود!

الكاميرا أصدق مِنِّي أحيانا
كل اما بضحك ضحكة مصطنعة..
الصورة تطلع مِنِّي مهزوزة!

كان بيتلكك يعيط

كان بيتلكك يعيط
لدرجة أنه دَمَعَ عشان..
نِسُّوا يقولوله: "تشرب إيه!؟"
ماfish معاه غير حزن خام
وماfish في جيئه..
أي باقي من المعافرة يعيش عليه
قَصَّى الحياة..
بيقول هيلقى الفرح في إكوام الظروف..
ومايلقا هوش
العمر داس على نَفْسُه كسَرها وجِري..
وماهم هوش
والشغل خد من روحه أغليها.. ومازال
والموت ماسابش معاه شريك..
والحُب شافُه.. ماحم هوش!
دلوقتي بقى حالُه إختَلَف
بقا هش زي القش مايبينقِذش حد..
وينفعُه
أضعف من اللي تمس عضمُه فَ يتكسر
وان حد سألُه "إزي حالك؟"..
خوف من إجابته لَ توجَعُه
كان حقُه تبقى حياته أبسط من كدة

يبقاله أسرة خفيفة الروح.. تبسطه
يلقى الي تمسك كفّه وقت ما يبسطه
وينام ما فيش إشكال في باله..
يلقى الي يرمي عليه سلامه
يرد سهل إن حد سألّه "إزي حاله؟"
يضحك إذا..
في شخص حب يودّه مرّة وزغزغه
أولمّح طيفها في خياله
أهوع الأقللو اتسأل..
أقرب صديق له بعد موته.. يرد "عاش"
دلوقتي بعد..
ما جه في تفكيره الي فات
دمع عشان..
حس أنّه ضيّع عمره في الآخر بلاش!

دفتر التوفير

راجل فقير..
مايملكش إلا ما يكفيه.. يعيش يومه
سمع عن دفتر التوفير..
فتح واحد
مكانش معاه فلوس علشان يحوشها..
فَ حط في دفتره همومه
وكل مشاكله.. والحزن اللي بيخفيه
وخفة دمه.. والضحك اللي بيصومه
وعجزه يدوق الأربع حيطان في البيت..
لون البويا
وبعد ما فات 9 اشهر.. في فبراير..
سحب تحويله م الدفتر..
طلع مجموعه "إسمي وشكلي".. بالحزن اللي جوايا
وطول الوقت كان الشخص ده أبويا!

أنا "محمد" ..

ماليش نصيب م الإسم غير الأربع حروف
وبلضم كل خيط مفتول.. بخيط دايب
علشان مافيش.. خيط لسنة سليم!
صديق بقلبي لكل المتساين طازة..
وكل المنتظر غايب!

بيستعملني البعض سطرين في الفراق
ويستعملني البعض تهوين لالألم
ويستعملني بالحب.. الحبايب
آخر نفر في طواير الحظوظ
مغنطيس ل الحزن لو بدرجة "شديد"
ممتازي تنقية الغلط م الصبح.. عيماني
شرير وطيب لو يعوز الأمر
صادق لدرجة..
تشوف ملامحي في سطر!..
مرآة واضحة لكل أحزاني
وكريم لدرجة.. تسيلي قلبك وحيد
وتاخده مش وحداني!!
عقلي اللي واقف فيا على حيله..
وبختاربيه
ما بقتش احكم قلبي يختارشي
لأني مش حمل اني اموت ثاني!

علّمت قلبي يصدق الحواديت من ستي بس
علشان كدة..
كل اما بسمع حكّي عن موتها.. ما صدق هوش!!
واستنى تيجي تواجه الكدبة..
وافضل بخانق عقلي لو صدق..
مجاتش حتّى تكذب الفكرة..
ولّا بتحوش!
لحد ما اضطريت اصدقهم..

وَحْتَةً مَاتَتْ فَيَا وَيَاها
دلوقتي مابقتش اللي كنت عليه
مفاضلش فيا شئ افرط فيه..
أوشئ اخاف من إني ماخسر هوش
وبرغم ده..

مابقتش اسيب قلبي في جسم غريب
علشان يرجع ناقصه جزء كبير..
وان سيبته جايز تاني ملحقهوش!

مش يعني كفاية عليا الحُزن اللي باعيشه..
كمان اكتب شعر!

الشعر نعمة على اللي يعرف يكتبه
والناس ماهيش فاهمة انه.. أسباب بلوته
السطر بيخرج.. زي رصاصة من الكاتب
ويلف يرجع تاني.. قصده يموته!
مابقتش قادر أعيش كدة..

خلصان.. مستهلك.. متجرب
مش بشكي الحال أو مش راضي
بس امّا بتتملي كوابية..

لآخر لازم هتسرب
مش عدل اني اصبح بالأوجاع.. للناس عبرة
صابر لكن..

أول ما تشكك إبرة لابد هتصرخ آه..
وانا عندي فوق الـ 500 إبرة!!

كنت النهاردة بقول ل نفسي..
شخص زي داست الأيام عليه..
إيه فايدته!
غير بس هما اتنين تلاتة معتبرينه أخ..
بيقفوا بين الموت وبينه
واتنين تلاتة بيشوفوه عكاز
العمر لما استعمله.. هَلَكْه
مبقاش يعيط حتى من عينه
وان تَمَنّوه.. مايجيبش حَقّه مجاز
كان أولى مني يتولد غيري
كنت هفتح باب ل زوجة عقيمة..
إِسْمُه "التجربة"
ونقلل المسافات ماين..
حاسّة سَمْعِها ولفظ "ماما"
ونبذل الأدوار انا وعيل مجاش
يقولوا ل امي الحمل كاذب..
ويقولوا ل اللي أجهضوه: "جيت بالسلامة!"

لو كنت مش موجود هنا..
كانت هتنزع فلوس أمي وأبويا..
على فردين وبس
وكان ساعتها..
شخص أولى بالوظيفة.. خد مكاني
واستفاد دايمًا في آخر كل شهر.. بَقْبُضْه كامل..
غير منا غاوي اصرفه

كان في ستارة وراها سريجوز مهمم..
كانت هتفضل لسة عدرا
لو ما كنتش بالفضلول.. غاوي اكشفه
في حسنة كان ممكن ياخدها شخص غيري
وقبل ما يموت تنفعه..
تبقاله قشة بسيطة.. تعدل كفتّه
في حد غيري يجوز ذكي..
هو اللي كتب النص ده
أو شخص مهمل.. كلفته
كانت حاجات كتير علشان.. تبقى عشان كتير
وكل واحد أولى.. ياخذ فرصته
يلموا فشلي في اكياس الزبالة..
معاه غرزلت في رجلي..
أو غرزمش لامة فيا.. ويحرقوها
وكل شئ سئ يردوا معاملته
لو كانت امي..
في الشهور الأولى ليها في حملها..
كات أهملت
كنت هبقى زماني مش موجود هنا
وكل حنة واخدها تبقى ل ناس كتير..
ومكاني يصبح مزدحم
لو كان ساعتها..
أمي بتناقش في روحها فكرة الانتحار
أنا كنت هعرف..
واشنقني قصد.. بحبل سري في الرحم!

0%

